

Bosna i Hercegovina
FEDERACIJA BOSNE I HERCEGOVINE
UNSKO SANSKI KANTON
KANTONALNI SUD U B.U
Broj 01 0 K 006076 12 K
Bihać, 01.02.2012.godine

Pravosnažno 23.02.2012. godine.
Presuda na osnovu sporazuma o
priznanju krivnje.

U IME FEDERACIJE BOSNE I HERCEGOVINE

Kantonalni sud u B.u u vijeću sastavljenom od sudija Hodžić Fikreta kao predsjednika vijeća, Pušac Vojislava i Šahinović Gare kao članova vijeća, sa zapisničarem Husarević Fatimom, u krivičnom predmetu protiv optuženih Tadić Jovice, Tadić Zorana, Berga Zorana, Babić Željka i Mihajlović Gorana, zbog krivičnog djela ratni zločin protiv civilnog stanovništva iz člana 142. stav 1. u vezi sa članom 22. preuzetog KZ SFRJ, postupajući po optužnici kantonalnog tužilaštva USK-a B. broj T01 0 KTRZ 0004628 11 od 30.11.2011.godine a nakon razmatranja sporazuma o priznanju krivnje i održanog pretresa za izricanje krivičnopravne sankcije, u prisustvu kantonalnog tužioca Mesić Jasmina, optuženih Tadić Jovice, Tadić Zorana, Berga Zorana, Babić Željka i Mihajlović Gorana, njihovih branioca po službenoj dužnosti, advokata Koruga Gorane, Radulović Predraga, Perić Slobodana, Čavkić Ermine i Stojanović Miodraga, dana 01.02.2012.godine donio je i javno objavio

P R E S U D U

Optuženi:

1.TADIĆ JOVICA zv. Kajo sin Đ. i majke M. djevojački Lj., rođen 12.08.1953. godine u mjestu R., općina B., JMB ..., nastanjen u naselju ..., općina P., pismen, sa završenom SSS, po zanimanju tekstilni tehničar, nezaposlen, neoženjen, bez djece, vojsku služio 1972. godine u K., vodi se u vojnoj evidenciji pri OMO P., lošeg imovnog stanja, po narodnosti ..., državljanin ..., do sada neosudjivan, nalazi se u pritvoru u KPZ PT B.;

2. TADIĆ ZORAN sin T. i majke M. djevojački G., rođen 21.04.1970. godine u K. V., općina B., JMB ..., nastanjen u naselju ..., općina P., pismen, sa završenom SSS, po zanimanju ugostitelj, oženjen, otac dvoje mlđb. djece, vojsku

služio 1989. godine u B., vodi se u vojnoj evidenciji pri OMO P., ima čin razvodnika, lošeg imovnog stanja, po narodnosti ..., državljanin ..., do sada neosudjivan nalazi se u pritvoru u KPZ PT B.;

3. BERGA ZORAN sin D. i majke D. djevojački V. ,rodjen 02.07.1973. godine u K. V., općina B., JMB ..., nastanjen u ..., pismen, sa završenom OŠ, po zanimanju radnik, oženjen, otac dvoje mlđb. djece, vojsku služio u V., vodi se u vojnoj evidenciji pri OMO B., lošeg imovnog stanja, po narodnosti ..., državljanin ..., do sada neosudjivan, nalazi se u pritvoru u KPZ PT B.;

4. BABIĆ ŽELJKO zv. Željko sin M. i majke B. djevojački K., rodjen 25.11.1965. godine u B., JMBG ..., nastanjen u M. H., općina B. L., pismen, sa završenom SSS, po zanimanju mašinbravar, oženjen, otac dvoje mlđb.djece, vojsku služio u T. D., vodi se u vojnoj evidenciji pri OMO B. L., lošeg imovnog stanja, po narodnosti ..., državljanin ..., do sada osudjivan, nalazi se u pritvoru u KPZ PT B.;

5. MIHAJLOVIĆ GORAN sin I. i majke M. djevojački P., rodjen 08.06.1968. godine u B., JMB ..., nastanjen u mjestu B., općina B., pismen, sa završenom SSS, po zanimanju vozač, oženjen, otac dvoje mlđb. djece, vojsku služio u S. P. 1987. godine, vodi se u vojnoj evidenciji pri OMO B., lošeg imovnog stanja, po narodnosti ..., državljanin ..., do sada osudjivan, nalazi se u pritvoru u KPZ PT B.

K R I V I S U

Što su:

Kršeci pravila Međunarodnog prava sadržana u IV Ženevskoj konvenciji o zaštiti građanskih lica za vrijeme rata od 12. augusta 1949 godine, Dopunskog protokola o zaštiti žrtava nemedjunarodnih oružanih sukoba (Protokol II) uz navedenu konvenciju, za vrijeme oružanog sukoba u BiH, kao pripadnici vojske i policije RS-a, u drugoj polovini mjeseca septembra 1992. godine, na području mjesta D., Č.- D. i O., općina B., lišili života 25 civila Bošnjačke narodnosti, postupajući protivno članu 3. IV Ženevske konvencije st. 1. tačka a. u vezi sa čl. 4. st. 1. i 2. tačka a. Protokola II uz navedenu konvenciju, tako što su:

a/ Tadić Zoran, Berga Zoran, Mihajlović Goran i Babić Željko, zajedno

- dana 23.09.1992 godine, u jutarnjim satima, u zaseoku M., selo O., općina B., naoružani automatskim puškama i obučeni u vojnim i policijskim uniformama, došli zajedno sa T. S. (nedostupan državnim organima), pred kuću M. I. kako bi pronašli M. Š., znajući da se isti nalazi kod njega i znajući da su prethodnu noć u O. ubijani civili bošnjačke narodnosti i paljene njihove kuće, te nakon što je neko od optuženih dozivao M. Š. da izađe iz kuće, na vratima su se

pojavi M. S. i njen brat M. Š., kada su optuženi u namjeri da ih liše života, u iste ispucali više metaka, usljed čega je M. S. rođena 1945. godine pala u unutrašnjost hodnika, te je od zadobivenih povreda preminula na licu mjesta, nakon čega je M. Š. uspio da pobjegne u unutrašnjost prostorije u kojoj se nalazio prozor, da bi spas našao bježeći kroz prozor u pravcu zaseoka L., osumnjičeni vidjevši da Š. bježi potrčali su za istim, pa kada su u voću, u blizini štale pronašli vlasnika kuće M. I. rođenog 1919. godine, u namjeri da ga liše života u istog ispucali više metaka od kojih povreda je isti preminuo na licu mjesta, pa kada im je M. Š. uspio da pobjegne, vratili su se nazad do ulaza u kuću, kako bi provjerili da se u kući ne nalazi još neko, da bi u unutrašnjost kuće ušli Tadić Zoran, Babić Željko i Mihajlović Goran držeći u rukama svoje automatske puške sa uprtim cijevima ispred sebe, dok su Berga Zoran i T. S. ostali ispred kuće, držeći svoje automatske puške u rukama u pravcu kuće u koju su ušli navedeni, kojom prilikom je Mihajlović Goran, vidjevši da se u jednoj prostoriji na dva kauča, ispod pokrivača miču tijela, vičući „tu se krijete, majku vam j.... „ u namjeri da ih liši života ispucao više rafala u pravcu istih, kojom prilikom su lišeni života H. M. rođena 1910. godine i M. H. rođena 1922. godine, a potom zapalili kuću u kojoj su ostala tijela ubijenih žena.

b/ Tadić Jovica zv. K., Tadić Zoran, Berga Zoran i Babić Željko, zajedno

- istog dana, 23.09.1992 godine, u vremenskom periodu od 16,00 -17,00 sati, u mjestu D., općina B., zajedno sa T. Đ. zv. M., T. S. (nedostupni državnim organima), Đ. S. i Đ. G. (koji su se, nakon par dana od ovog događaja u porodičnoj svadji izmedju sebe poubijali), došli sa dva putnička motorna vozila do mjesta gdje su civili bošnjačke narodnosti sa područja naselja R. i O., općina B., radili na radnoj obavezi branja šljiva, određenoj od strane Ratnog predsjedništva „Srpske opštine B.“, da bi svi naoružani automatskim oružjem, obučeni u vojne i policijske uniforme i maskirani sa kapama i čarapama na glavi, prišli do civila, koji su te prilike sjedili ispred kuće V. H., a neki od njih radili po okolnim voćnjacima, te u namjeri da ih liše života u iste ispucali više rafala iz automatskih pušaka, te kada su vidjeli da se neki od civila sakrivaju u štalu u blizini asfaltnog puta, na sjenik iste bacili bombu, a neke od civila ubadali nožem, kojom prilikom su lišili života: N. H. rođen 1929. godine, Š. B. rođen 1940. godine, Š. S. rođenu 1945. godine, Š. H. rođenu 1949. godine, Dž. I. rođenu 1956. godine, Š. Z. rođenu 1954. godine, M. S. rođenu 1942. godine, D. M. rođen 1934. godine, D. M.1 rođen 1929. godine, D. A. rođen 1934. godine, R. Š. rođen 1929. godine, Š. H.1 rođen 1933. godine, V. V. rođenu 1914. godine, V. F. rođenu 1919. godine, V. S. rođenu 1947. godine, V. A. rođena 1979. godine, K. S. rođenu 1962. godine i Š. S.1 rođenu 1928. godine, a potom tijela ubijenih stavljali na hrpu i palili, dok su istog dana i na istom mjestu, u namjeri da liše života H. T., koja se nalazila neposredno uz kuću V. H. u istu ispucali više metaka iz automatskih pušaka, kojom prilikom je ista zadobila teške tjelesne povrede sa trajnim i znatnim posljedicama, izraženim u vidu višestrukog preloma obje kosti podlaktice i povrede na lijevoj nadkoljenici, a koja se uspjela spasiti bježanjem u unutrašnjost kuće.

c/ Tadić Zoran i Babić Željko - zajedno

- kasnije istog dana, 23.09.1992 godine, u poslijepodnevnom satima, vraćajući se iz D., gdje su zajedno sa drugima učestvovali u ubistvima većeg broja civila, došli u zaseok K.- R., općina B., znajući da se u kući vlasništvo K. M., nalaze A. R. rođen 1924. godine i njegova supruga A. K. rođena 1924. godine, koji su od ranije bili u dobrim odnosima sa K. M. i kod kojeg su došli tražiti spas jer su se tih dana dešavala ubistva u O., optuženi naoružani automatskim puškama i obučeni u policijske uniforme, iz kuće su izveli A. R. i A. K. tjerajući ih ispred sebe sa uprtim automatskim puškama, vičući „j... vas onaj ko vas krije“, da bi ih doveli do asfaltnog puta gdje ih je sa vozilom čekao G. N. zv. C. i lice po nadimku B. iz R.Hrvatske (nedostupni državnim organima), te iste sa p.m.v. kojim je upravljao G. N. odveli na lokaciju zv. D., gdje su zaustavili vozilo i iz vozila izveli A. R. i A. K., te u namjeri da ih liše života, doveli do ruba provalije uz šumu, u blizini asfaltnog puta, naguravajući ih automatskim puškama, kada je jedan od njih iz automatske puške ispucao više rafala u navedena lica, koja su pogodjena pala niza stranu, kojom prilikom je A. R. zadobio strijelne rane lijevog kuka, lijeve nadlaktice i lijeve podkoljenice, a A. K. strijelne rane lijeve nadkoljenice i desne podkoljenice, od kojih povreda su preminuli na licu mjesta.

d/ Mihajlović Goran - sam

- krajem mjeseca septembra 1992 godine, u prijepodnevnom satima, u mjestu L., selo O., općina B., u blizini stare kuće L. M., znajući da se M. Š. nalazi u blizini te kuće i da traži pomoć, naoružan sa automatskom puškom u policijskoj uniformi zajedno sa rezervnim policajcem K. M., otišao da pronadje M. Š. rođen 1953. godine, na koga je zajedno sa drugim licima pucao ranije dana 23.09.1992 godine u kući M. I. u zaseoku M., gdje mu je isti pobjegao, pa kada ga je pronašao na jednoj livadi, vidjevši ga kako se bespomoćno drži odbočen na dva štapa, tražeći pomoć od njega, u namjeri da ga liši života u istog ispucao više metaka iz automatske puške od kojih povreda je Š. M. preminuo na licu mjesta.

Dakle, kršeći pravila međunarodnog prava za vrijeme rata u BiH izvršili ubistva i pokušaj ubistva civila.

Čime su pod tačkama a, b i c. kao saizvršioc , a pod tačkom d. kao izvršilac počinili krivično djelo –ratni zločin protiv civilnog stanovništva iz čl. 142. st.1. u vezi sa čl. 22. preuzetog KZ SFRJ, pa se primjenom istog zakonskog propisa i uz primjenu odredaba člana 41. preuzetog KZ SFRJ

O S U Đ U J U

Optuženi TADIĆ JOVICA na kaznu zatvora u trajanju od 12 (dvanaest) godina.

Optuženi TADIĆ ZORAN na kaznu zatvora u trajanju od 12(dvanaest) godina.

Optuženi BERGA ZORAN na kaznu zatvora u trajanju od 11 (jedanaest) godina.

Optuženi BABIĆ ŽELJKO na kaznu zatvora u trajanju od 12 (dvanaest) godina.

Optuženi MIHAJLOVIĆ GORAN na kaznu zatvora u trajanju od 10 (deset) godina i 6 (šest) mjeseci.

U smislu člana 50 stav 1. preuzetog KZ SFRJ u izrečene kazne zatvora optuženim se uračunava vrijeme provedeno u pritvoru i to optuženom Tadić Jovici počev od 15.09.2011.godine, optuženom Tadić Zoranu počev od 15.09.2011.godine, optuženom Berga Zoranu počev od 15.09.2011.godine, optuženom Babić Željku počev od 29.09.2011.godine i optuženom Mihajlović Goranu počev od 10.11.2011.godine, pa nadalje.

U smislu člana 212. stav 3. ZKP-a FBiH porodica ubijenih M. S., M. I., H. M., M. H., N. H., Š. B., Š. S., Š. H., Dž. I., Š. Z., M. S., D. M., D. M., D. A., R. Š., Š. H., V. V., V. F., V. S., V. A., K. S., A. R., A. K. i M. Š. te oštećena H. T. sa imovinskopravnim zahtjevom upućuju se na parnični postupak.

U smislu člana 202. stav 4. ZKP-a FBiH optuženi se oslobađaju dužnosti plaćanja troškova krivičnog postupka.

O b r a z l o ž e n j e

Kantonalno tužilaštvo USK-a Bihać pod brojem T01 0 KTRZ 0004628 11 dana 31.11.2011.godine, podiglo je optužnicu protiv optuženih Tadić Jovice, Tadić Zorana, Berga Zorana, Babić Željka i Mihajlović Gorana, stavljajući im na teret izvršenje krivičnog djela ratni zločin protiv civilnog stanovništva iz člana 142. stav 1. u vezi sa članom 22 preuzetog KZ SFRJ.

Rješenjem sudije za prethodno saslušanje ovog suda broj 01 0 K 006076 11 KPS od 06.12.2011.godine optužnica je potvrđena u odnosu na

optužene i na sve tačke optužnice, a optuženi su se pred sudijom za prethodno saslušanje izjasnili da nisu krivi.

U toku priprema za glavni pretres dana 18.01.2012. godine u spis su uloženi sporazumi o priznanju krivnje zaključeni između kantonalnog tužioca i odbrane optuženih. Tim sporazumima optuženi su priznali krivnju, obavezali su se da sarađuju sa organima krivičnog gonjenja u BiH i da svjedoče o događajima i licima koja su im poznata vezano za krivična djela ratnih zločina izvršenih na području Općine Bihać, za vrijeme rata u BiH a saglasili su se da im se izrekne kazna zatvora i to: optuženom Tadić Jovici kazna zatvora u trajanju od 11 (jedanaest) do 13 (trinaest) godina, optuženom Tadić Zoranu kazna zatvora u trajanju od 11 (jedanaest) do 13 (trinaest) godina, optuženom Berga Zoranu kazna zatvora u trajanju od 10 (deset) do 13(trinaest) godina, optuženom Babić Željku kazna zatvora u trajanju od 11 (jedanaest) do 13 (trinaest) godina i Mihajlović Željku kazna zatvora u trajanju od 10 (deset) do 11 (jednaest) godina.

Razmatrajući sporazume o priznanju krivnje sud je utvrdio da su optuženi sporazume zaključili dobrovoljno, svjesno i sa razumjevanjem, da su upoznati sa svim posljedicama koje proističu iz sporazuma, uključujući i posljedice vezane za imovinskopравни zahtjev i troškove krivičnog postupka, da optuženi razumiju da se zaključivanjem sporazuma o priznanju krivnje odriču prava na suđenje i da neće moći uložiti žalbu na krivičnopravnu sankciju koja će im se izreći, ukoliko sud prihvati sporazum. Sud je utvrdio da su predložene krivičnopravne sankcije optuženim u skladu sa krivičnim Zakonom, kako to i nalaže odredba člana 246. stav 3. ZKP-a FBiH a da je oštećenim data mogućnost da se pred tužiocem izjasne o imovinskopravnom zahtjevu.

Prilikom razmatranja sporazuma o priznanju krivnje, utvrđeno je da se krivnja optuženih temelji na iskazima optuženih, na iskazima svjedoka: M. R., H. Š., M. M., De. F., Š. F., D. S., Š. A., Š. S., D. Z. kćeri H., D. Z. kćeri Š., Š. H., Š. H., R. F., V.I., Š. A., K. S., H. Š., V. A., Dž. M., H. T., R. U., T. S., Dž. A., S. I., P. M., I. M., P. S., B. M., V. J., K. M., S. M., K. S., S. Ž., V. D., P. D., K. B., S. K., K. N., A. B., M. R., K. M., K. B., M. D., Đ. G., nalazima i mišljenjima vještaka Rakočević dr. Miroslava, Sarajlić dr. Nermina, Durmišević dr. Dževada i Mešić-Pašalić Semire, na iskazima svjedoka R. M., V. I., D. B. i R. R. koji su u međuvremenu umrli na materijalnim dokazima i to: fotodokumentaciji K MUP-a B. broj SL 07 od 09.11.2007.godine, zapisniku o izlasku na lice mjesta po kazivanju optuženog Tadić Zorana od 09.11.2011.godine i fotodokumentaciji, DVD snimku po kazivanju optuženog Tadić Zorana lokacija na kojima su izvršeni zločini od 09.11.2011.godine, zapisniku o izlasku na lice mjesta i fotodokumentaciji po kazivanju optuženog Berga Zorana, zapisniku o izlasku na lice mjesta i fotodokumentaciji po kazivanju optuženog Babić Željka, zapisniku o izvršenoj provjeri lokaliteta mjesta D.-Ć. i fotodokumentaciji po kazivanju optuženog Tadić Jovice, zapisnik o izlasku na lice mjesta i fotodokumentacija ubistva M. Š. po kazivanju svjedoka K. M., zapisnik o izlasku na lice mjesta ubistva civila sa 22/23 od 09.09.1992.godine u mjestu O. po kazivanju K. M. i H. J., crtež lica mjesta,

topografska karta naselja O.-Ć.-D. sa pregledom lokacija na kojima su ubijeni civili 22. i 23.09.1992.godine, zapisnik o ekshumaciji broj kri 19/00 od 08.04.2000.godine, fotodokumentacija i crtež lica mjesta ekshumacije devet tijela u naseljima Ć.-O. od 07.04.2000.godine, zapisnik o ekshumaciji i obdukciji mrtvih tijela nađenih na lokaciji Ć.-O.-D.-D. sa nalazom i mišljenjem vještaka Rakočević dr. Miroslava od 15.04.2000.godine, zapisnik o izvršenim obdukcijama posmrtnih ostataka od 14.02.2011.godine, fotodokumentacija obdukcije tijela D. I., M. S., N. H., D. M., D. M., M. I., Š. H., zapisnik o obdukciji DNA report za Š. S., V. S., Š. H., N. H., D. M., Dž. I., M. I., D. M., M. S., nalaz i mišljenje vještaka Rakočević dr. Miroslava o prirodi povrede te medicinska i fotodokumentacija za oštećenu H. T., zapisnik o uviđaju broj Kri:59/98 od 28.08.1998.godine o ekshumaciji M. S., H. M. i M. H. sa fotodokumentacijom i crtežom lica mjesta te zapisnikom o pregledu posmrtnih ostataka, zapisnik o izvršenoj ekshumaciji i obdukciji u mjestu D.-Ć. skeletnih ostataka A. R. i A. K. sa fotodokumentacijom i crtežom lica mjesta te nalazom i mišljenjem vještaka o obdukciji Durmišević dr. Dževada, zapisnik o uviđaju broj Kri:4/96 od 18.01.1996.godine o pronalasku kostiju u kućama H. R. i H. B. te fotodokumentacijom i crtežom lica mjesta, zapisnikom o obdukciji i identifikaciji mrtvih tijela H. M. i H. B., izvodima iz matične knjige umrlih za Š. S., Š. B., Š. H., D. M., D. A., N. H., M. M., M. Š., V. Z., V. M., V. I., R. R., M. I., D. B., Š. R. i T. T., rješenja Srpske opštine B. od 04.09.1992.godine o uvođenju radnje obaveze, spiska radnika SJB Srpske opštine B. raspoređenih na rad u rezervnu miliciju K. V..

Sud je u smislu člana 246. stav 5. ZKP-a FBiH prihvatio sporazume koje su zaključili kantonalni tužilac i optuženi u prisustvu svojih branioca te je optuženom Tadić Jovici izrekao kaznu zatvora u trajanju od 12 (dvanaest) godina, optuženom Tadić Zoranu kaznu zatvora u trajanju od 12 (dvanaest) godina, optuženom Berga Zoranu kazna zatvora u trajanju od 11 (jedanaest) godina, optuženom Babić Željku kazna zatvora u trajanju od 12 (dvanaest) godina i optuženom Mihajlović Goranu kazna zatvora u trajanju od 10 (deset) godina i 6 (šest) mjeseci.

Prilikom odmjeravanja kazne sud je uzeo u obzir sve okolnosti predviđene odredbom člana 41. preuzetog KZ SFRJ, imajući pritom u vidu svrhu kažnjavanja kao i kazne zatvora koje su predložene u zaključenim sporazumima. Od olakšavajućih okolnosti sud je za sve optužene uzeo u obzir njihove lične i porodične prilike, da su svi optuženi osim Tadić Jovice oženjeni, da su očevi dvoje mladb.djece, da su slabog imovnog stanja, kao i protek vremena obzirom da je od izvršenja krivičnog djela proteklo više od 19 (devetnaest) godina. Sud je posebno cijenio da se optuženi zaključivanjem sporazuma o priznanju krivnje priznali radnje izvršenja i krivično djelo koje im se stavlja na teret, da su izrazili duboko kajanje te da su na taj način u velikoj mjeri doprinijeli rasvjetljavanju ovog krivičnog slučaja. Od otežavajućih okolnosti sud je za sve optužene uzeo u obzir sam način izvršenja krivičnog djela te drskost, upornost, bezobzirnost i teške posljedice koje su tom prilikom nastupile, obzirom da je ukupno lišeno

života 25 (dvadeset i pet) osoba a da je jedna osoba zadobila teške tjelesne povrede sa trajnim posljedicama.

U smislu člana 50. stav 1. preuzetog KZ SFRJ u izrečene kazne zatvora optuženim je uračunato vrijeme provedeno u pritvoru i to optuženim Tadić Jovici, Tadić Zoranu i Berga Zoranu počev od 15.09.2011.godine pa na dalje, optuženom Babić Željku počev od 29.09.2011.godine pa na dalje a optuženom Mihajlović Goranu počev od 10.11.2011.godine pa na dalje.

U smislu člana 212. stav 3. ZKP-a FBiH porodica ubijenih M. S., M. I., H. M., M. H., N. H., Š. B., Š. S., Š. H., Dž. I., Š. Z., M. S., D. M., D. M. 2, D. A., R. Š., Š. H., V. V., V. F., V. S., V. A., K. S., A. R., A. K. i M. Š. te oštećena H. T. sa imovinskopravnim zahtjevom upućene su na parnični postupak.

U smislu člana 202. stav 4. ZKP-a FBiH optuženi su oslobođeni dužnosti plaćanja troškova krivičnog postupka. Iz provedenih dokaza utvrđeno je da su svi optuženi slabog imovnog stanja, da su izbjegla - raseljena lica te da bi njihovim obavezivanjem na plaćanje troškova krivičnog postupka bila dovedena u pitanje ne samo njihova već i egzistencija članova porodice koje su oni dužni da izdržavaju.

ZAPISNIČAR
Husarević Fatima

PREDSJEDNIK VIJEĆA
Hodžić Fikret

PRAVNA POUKA

Protiv ove presude dozvoljena je žalba u roku od 15 dana Vrhovnom sudu Federacije BiH, a putem ovog suda. Žalba nije dozvoljena zbog odluke o izrečenoj krivičnopravnoj sankciji.